

摘藻堂四庫全書薈要

集部

欽定四庫全書薈要卷一萬四千四百七十四

集部

宛陵集卷三十四

宋 梅堯臣 撰

使風

跨下橋南逆水風十幅蒲帆彎若弓  
淮波帶日魚鱗紅  
岌岌飛上北斗中  
龜山始撞人定鐘  
岸草澁澁鳴秋蟲  
田家屋上壺

脩蔓屋頭綴大壺  
簷外垂霜乾葉猶苦  
風斷根未移收

挂煙突近開充酒具遲賤生無所用會有千金時

九月二日夢後寄裴如晦

裴生安健否試問鴈經過處士賦鸚鵡將軍養駱駝食  
魚今飽未索米柰貧何昨夜分明夢持書認篆窠

昭信淮上

清淮渺然去白浪勢如奔同發已先遠獨行將向昏洲  
長寧辨路夜泊偶依村燈火稍覺亂應聞人語喧

小村

淮濶州多忽有村棘籬踈敗謾為門寒難得食自呼伴  
老叟無衣猶抱孫野艇鳥翹唯斷纜枯桑水齧只危根  
嗟哉生計一如此謬入王民版籍論

難知

自古難知不遇人朝為蛇鼠暮龍鱗魏齊客溺簣中死  
亭長妻輕跨下貧白石夜歌誰與進黃金懷印自能伸  
丈夫只患無才業何恨區區逐路塵

九山

我經九山問野叟崔嵬一無安曰九且恐斷岸積瓊玖  
復意陂原多產韭又疑堆壠若柱灸四者未悟叟不言  
使我臨流獨搔首

淮岸

秋水刷土骨峭瘦如老石虛沙歸島嶼寒浪漱竅隙下  
過白魚尾上有蒼獺跡平崗自相連野獐鳴風櫟

原有禽倏鳴升遽默下

小禽不盈握羽翮自輕捷裊裊上雲鳴聲窮如隕葉雀

懷啄粟娛鷄有棲蒿愜嗟力甚微枉與鷹鷄接

浮來山

舊說此山  
產雲母

秦鬼驅卯沙聚結無蒼翠誰云海上移能與潮浮至洞  
噓蛟鼉腥廟畫風雷異雲母今有無庶為仙藥餌

泊下黃溪

黃溪晚來泊得見田家微刺艇斜陽下耕洲載耒歸牛  
鳴向空瀆犬喜入人衣復有返樵者擔枯翹雉肥

濠梁感懷

天子昔封禪吾叔從金輿迴首泰山下出建雙隼旗來  
尋觀魚臺遂遠承明廬當時十五詠螢照墨石書

渦口

秋水見灘底淺沙交浪痕白魚跳處急宿鴈下時昏帶  
月入渦尾落帆防石根清淮行未盡明日又前村

夢同諸公餞仲文夢中坐上作

已許郊間陳祖席少停車馬莫催行劉郎休恨三千里  
樽酒十分聽我傾

過塗荆二山遇暗石

淮流兩山間勢束秋漲急聚石如伏兵歛歛波下立輕  
舟不可防而沉昧所習暗值掩已毀後者戒前及同發  
去漸遙更愁寒灘澁

舟上采菊

泯泯平慢流行當季秋月演漾過汀洲汀洲芳杜歇白  
露夜正霏黃菊寒更發采以泛酒卮不獨映華髮

朝暮



氣候輒未定寒暄朝暮間挾纈水風生衣綌川陽還綠  
草藏邃岸枯櫟植高山且非天時異順理心自閒

荆山

和楚人茲楚地泣玉山無所記但見楚人誇產玉古廟  
幽幽無鬼哭儻有鬼定無足

塗山

古傳神禹迹今向舊山阿莫問辛壬娶從來甲子多夜  
淮低激射朝江上嵯峨荒廟立泥骨巖頭風雨過

曉日

出舟曉日升  
瞳矐波上爛  
爛黃金銘  
冪厯紫煙生  
鏡中釣船似  
畫分橫縱  
風莫從虎雲  
從龍變作霏  
霞重複重  
雞聲

雞聲踏曉呼  
呼起扶桑烏  
含光如車輪  
碾雲蹤跡無  
誰教夸父逐  
遠向鄧林趨  
復從海底轉  
循環似轆轤

采杞

誰謂岸無杞  
條其長矣誰  
謂杞無實爛  
其皇矣掇彼

笑擔既盈矣捨棘與蠹造此宜酒維此宜酒我挹我注  
我飲我助以養我顓

泊陂澗觀渡

隔岸呼舟檝臨河立馬牛解鞍沙上憩沉網渚間收殘  
日銜沙尾孤帆落成頭莫愁暄作雨晚水白煙浮

看山寄宋中道

前山不礙遠斷處吐尖碧研青點無光淡墨近有跡前  
林橫白雲復與後嶺隔孤舟川上人引望不知夕安得

老畫師寫寄幽懷客

暮雨

水上魚吹白露山頭雲與龍附潭中水作潭中雨朱鼈  
飛過吳洲去鯉魚相隨不知數老蛤銜泥在深處

細雨樵行

鮫人困卧寒潭底恬波濛濛垂白綃波上女兒飛輕撓  
逆流自與郎去樵風吹鬢髮不及撩鴉翅卷起蠶尾翹  
濃纈羅帶長繞腰日暮下來吹短簫

晨鴉

雲昏月黑鴉不知鼓聲鼕鼕雞報啼睥睨未辨天東西  
癡雛噪舞羣翅低野桑葉卷風淒淒濃霧不起寒雨迷  
晨鴉却歸巢上棲

會稽婦

食藕莫問濁水泥嫁婿莫問寒家兒寒兒黧黑面無脂  
驢子縱瘦骨骼奇買臣貧賤妻生離行歌負薪何媿之  
高車來駕建朱旗銅牙文弩擐犀皮官迎吏走馬萬蹄

江潮盡起橫白霓舊妻呼載後乘歸悔淚夜落無聲啼  
吳酒雖美吳魚肥儂今豢養慙猪雞園中高樹多曲枝  
一日挂與桑蟲齊

九日次壽州

昔人把菊望青盃今我持酒無黃花自催屋裏紅鱗膾  
不彈牆頭白項鴉壽春城高枕淮水綠蒲疎疎暮帆起  
登臨不學孟叅軍帽墜山風費嘲紙

泊壽春龍潭上夜半黑風破一舟

盲風吼空來不識前山遮迴激入灣口暗浪騰水涯喧  
聞破我船沉沒驚一家晦昧若塗漆心緒如亂麻燈光  
不出戶鬼火空照沙百物任漂蕩薄命誰怨嗟但存此  
空舟坐類鳥寄槎妻孥皆失色一夕鬢欲華倉惶俟天  
明頃刻抵歲遐雨寒雞唱遲況乃城上鴉

潁上得鯉魚為膾懷餘姚謝師厚

青蓑潭上老潁尾網中魚買作秋盤膾還思遠客書越  
壘橙熟久楚飯稻春初雖去故鄉遠不嫌為饌踈

丘家渡早發

曲頰若秋蛇屈盤鱗甲活問成得耕人拾魚逢祭獺草  
窠殘野燒樹挂經流沫百里相對看頻行媿迂濶

水次蘚花

秋雨日霏霏碧花生疊疊水邊有神女粧去遺翠靨岸  
側小家婦不知所宜愜采得未還人自將渾面帖

夜行憶山中

青熒鬼火動不悟前山雨昏徑梟鳥鳴獨行毛髮聚  
樹



葉枯綴林風動疑有虎低迷薄雲開心喜淡月吐

村醪

雨濕破荆籬風搖樹亞旗小槽聲不急挈榼問沽遲摘  
果野棠熟望人船火隨燈前相對飲還似昔過時

川上田家

斜光隔河明入照桑柘下臯隴生麥苗青青尚堪把遠  
見牛羊歸相親童稚野醉歌秋草間頗與世情寡

發勻陵

秋雨密無迹濛濛在一川孤村望漸遠去鳥飛已先向  
晚雲漏日微光人倚船安知偶自適落岸逢沙泉

聞鴈

濕雲夜不散薄處微有星孤鴈去何急一聲愁更聽心  
應失舊侶翅已高青冥幾日江海上鳬鷗共滿汀

牽船人

沙洲折脚鴈疑人鋪翅行柰何暮雨來復值寒風生濕  
毛染泥滓縮頸無鳴聲爾輩正若此猶勝被堅兵

田人夜歸

田收野更迥墟里隔煙陂荒徑已風急獨行唯犬隨荆扉候不掩稚子望先知自是一生樂何須閭井為

行次潁州聞張甥宗亮不捷鄉薦以詩唁而迎之風前汝陰道雨冷江南書始歎與意異何慙定鑑跡但能存楚玉切莫道黔驢不負當時約馳迎一乘車

聞櫓

靜夜有舟下中流聞櫓聲隔牕燈已暗卷幔月微明漸

向寒灣遠遙應宿枕驚客心何苦急曾是不緣名

晚鷗

晴川帶微陽鷗鳥雙飛去雙飛如有歸並宿向何處汀  
寒霧暮厯水落沙沮洳不避近行舟應知心寡慮

新晴

陰雲忽掃盡朝日吐清光萬里不礙日衆鳥欣哢草  
樹已搖落山川尚鬱蒼百事擇佳日佳日唯晴陽

將次項城阻風舟不能進

逆水寒風急輕舟挽不前因來泊古渡聊且上平田草  
軟行方穩鶉鷺驚去瞥然却尋孤岸遠吹幘亂華顛

斫膾懷永叔

高河古穴深下有蒼鱗鯽出水獐將飛落刀細可織香  
粳炊正滑白酒美少力但欠平生歡共此中路食

夜漁

夜漁歸自速短艇若飛雲水動月猶白欸音人不聞迴  
身明燭底撫卷至宵分我以此為足勞勞非爾羣

驚鳧

驚鳧雖避人終戀舊所泊盡背船頭去却從船尾落須  
知取勢高不是初飛錯

十月三日相公花下小飲賦四題

拒霜

木杪芙蓉花開非紅艷早常畏晚霜寒朱華競衰草

九月二十八日牡丹

香包已向青春發又見秋深特地開應笑菊殘無意思

不能邀賦洛陽才

殘菊

零落黃金藥雖枯不改香深叢隱孤秀猶得奉清觴

三日讌集

蕭然寒圃有殘芳吟徧朱欄向夕陽既許坐陪公袞貴  
却慙蒿羽接鸞凰

依韻許主客北樓夜會

一月能逢幾笑歡高樓紅蠟滴金盤吟餘隴首雲初散

唱盡陽關露已寒  
不管星河漸西落  
自將煙水去程寬  
當時坐客各南北  
誰憶重遊泛木蘭

謹和相國屋上菊叢

屋上有叢菊結根深  
瓦縫既無地勢美又乏土力擁  
乃因塗明生不由人所種  
亦能應節開焉取入公用  
公來步廣庭間鴈目始縱  
忽見粲然英降植合常從  
賓僚席其傍詠玩意已重  
物莫厭僻遠會遇良可頌

寒菜



畦蔬收莫晚圃吏已能供根脆土將凍葉萎霜漸濃不  
應虛已飭還得間庖饗旨蓄詩人詠從來用禦冬

送裴節推歸京

遠水未生凍輕舟歸大梁岸迴初向月篙滑始霑霜清  
世豈淹俊上公存薦章行應重對策莫愧漢賢良

十月菊上蜂

黃蜂得晴日不道菊開稀向榮晚寒起落叢無力飛輕  
輕難自舉怙怙一何微莫問巢房處斜陽柰欲歸

送江學士睦州通判

涉淮淮水淺沂溪溪水遲君到桐廬日正值采茶時試  
問嚴陵跡今復有誰知

和民樂

歲晚場功畢野老相經過有酒自斟酌適意同笑歌大  
兒緝牛衣小兒護雞窠困廩見餘積息成靡負戈林間  
落熟果屋裏鳴寒梭會待朔雪時狐兔生且羅飲鮮持  
作腊贈乏不言他是非了莫問此理當如何

和晚花

春花莫厭早秋花莫厭遲各不相羨慕榮枯乃繫時美  
蓉東籬英雖晚亦自宜霜前給給開霜後差差萎深處  
有孤萼寒月尚見披野蜂徒愛香凍翼不能支抱枝無  
力去憫然見恩私

聞進士販茶

自此宣州至和  
二年五月後

山園茶盛四五月江南竊販如豺狼頑凶少壯冒嶺險  
夜行作隊如刀槍浮浪書生亦貪利吏笥經箱為盜囊

津頭吏卒雖捕獲官司直惜儒衣裳却來城中談孔孟  
言語便欲非堯湯三日夏雨刺昏墊五日炎熱譏旱傷  
百端得錢事酒肉屋裏餓婦無糒糧一身溝壑乃自取  
將相賢科何爾當

梅雨

三日雨不止蚯蚓上我堂濕茵生枯籬潤氣醖素裳東  
池蝦蟆兒無限相跳梁野草侵花圃忽與欄干長門前無  
車馬苔色何蒼蒼屋後昭亭山又被雲蔽藏四向不可

往靜坐唯一牀寂然忘外慮微誦黃庭章妻子笑我閒  
曷不自舉觴已勝伯倫婦一醉猶在傍

鳥毀燕巢

堂間兩胡燕哺雛銜百蟲老鴉亦養子偷雛燕巢中燕  
巢忽墮地六七皆命窮赤身無羽翼斷彼雌雄來往  
徒鳴聲安得置室宮我閔托窶數俄已遘雨風從今更  
生卵不若授女娥

五月十三日大水

誰知山中水忽向舍外流誰知門前路已通溪中舟窮  
蛇上竹枝聚蚓登階陬我家地勢高四顧如潮漉浮萍  
穿籬眼斷葑過屋頭官吏救市橋停車當市樓應念此  
中居望不辨馬牛危湍瀉天河漫漫無汀洲羣蛙正得  
時日夜鳴不休戢戢後池魚隨波去難留揚鬣雖自在  
江上多網鉤紛紜閭里兒踊躍競學泅吾慕孔宣父有  
意乘桴浮

宛陵集卷三十四

謹案卷三十四第九頁前五行幾日江海上按宋


文鑑海作湖

第十三頁前八行此理當如何刊本如何訛何如

今改







總校官庶吉士臣張能照

校對官庶吉士臣戴心亨

謄錄監生臣徐繩玉

欽定四庫全書薈要

集部

宛陵集卷三十

七  
五至

詳校官助教臣常循



欽定四庫全書薈要卷一萬四千四百七十五

集部

宛陵集卷三十五

宋 梅堯臣 撰

依韻和正仲賦揚兵部吳興亭

雨過見虹明長橋欲映城牕間晴氣入空際晝涼生有  
扇徒看畫無冰自覺清人知太守姓不減漢公名

清風樓

在昔有佳句故人如遠來競生吳客衽不上楚王臺稍

拂清樽動時吹翠帶開長安在何處水鳥望中迴

明月樓

雲雲前溪白蒼蒼後嶺巍人疑槎上客星合蚌中暉影  
轉闌干迥盃行漏鼓稀只知誇粉黛不向桂邊歸

碧瀾堂

虛雲臨滉漾橋勢對隆穹環珮佳人去汀洲翠帶空橘  
舫過砌下蘭棟起雲中欲問芳菲地吳王一廢宮

逍遙堂

江東有賢守好客似春申自構杏梁地不生珠履塵樂  
章思季子後俊得吳均寢卧在其下知君學至人

依韻和行之都官芭蕉詩

看取有心常不展亦知隨分圻佳葩無端大葉映蓮幕  
却笑菖蒲罕見花

促織

札札草間鳴促促機上聲織女夜中起明河簷外橫一  
絲不入杼踈密工未精豈知天孫巧衣脫六銖輕人間

唯貴重暗蟲休催成

吳仲庶殿院寄示與呂冲之馬仲涂唱和詩六篇  
邀予次韻焉

次韻被命出城共汎

三驄忽出乘楚艘直氣突兀如吳濤大都智勇皆世豪  
橫身破浪親戰舳迴舷受箭誰畏曹猛士心伏寒生毛  
風聲鶴唳傳九皋何用寶刀稱孟勞右持酒盃左持螯  
功成各慕前人高不言大享烹太牢下與尺鷃翔於蒿

依韻游陳留禪寺後池

共逢香刹住萬景筆頭堆池水蛟龍盡汀洲鴈鵠來遠  
遊情莫落去國意徘徊舟子休敲鼓王程不爾催

次韻晚泊睢陽

日下繡衣客江南燕尾艍跡雖同鷁退心不假犀涼舊  
國旌旄去包原苑囿荒臨堤一懷古柳上見微陽

汴渠

我實山野人不識經濟宜聞歌汴渠勞謾綴汴渠詩汴



水源本清隨分黃河支濁流方已盛清派不可推天王  
居大梁龍舉雲必隨設無通舟航百貨當陸馳人間牛  
騾驢定應無完皮苟欲東南蘇要省聚斂為兵衛詎能  
削乃須雄京師今來雖太平盡罷未是時願循祖宗規  
勿益羣息之譬竭兩川賦豈由此水施縱有三峽下率  
皆羸冗資慎莫尤汴渠非渠取膏脂

次韻臨淮感事

楚舸高帆未可開滿帆風暴作陰雷聖文疊疊傷漂溺

世路紛紛自往來浮磬猶聞傳激越  
沉妖不見鎖淵回  
連陂鼃黽鳴無數安得周官為灑灰

次韻夜過新開湖憶二御共泛

出丹湖渺渺月白絕纖氛已見水如鑑  
莫生波上雲  
獨征何慕侶冷酌不知醺  
露下清吟久同心本愛君

答宣城張主簿遺鴉山茶次其韻

昔觀唐人詩茶韻鴉山嘉鴉銜茶子  
生遂同山名鴉重  
以初槍旗采之穿煙霞  
江南雖盛產處處無此茶纖嫩

如雀舌煎烹比露芽競收青弱焙不重漉酒紗顧渚亦  
頗近蒙頂來以遐雙井鷹掇爪建溪春剝葩日鑄美香  
美天目猶稻麻吳人與越人各各相闢夸傳買費金帛  
愛貪無夷華甘苦不一致精麤還有差至珍非貴多為  
贈勿言此如何煩縣僚忽遺及我家雪貯雙砂罍詩琢  
無玉瑕文字搜怪奇難於抱長蛇明珠滿紙上剩畜不  
為奢玩久手生胝窺久眼生花嘗聞茗消肉應亦可破  
瘕飲啜氣覺清賞重歎復嗟歎既不足吟誦又豈加

我今實強為君莫笑我耶

送寧國軍宰崔寺丞移臨安

六月畏嶺險乃陟川程迂遙看雲中鴈不亂江上鳬魚  
網離飛鴻我邑望何殊鱗方懷其剖鳥反值以剗為言  
等王民豈限楚與吳是維見戀慕作詩贈路隅

辯疑贈獻甫

一客逢吠狗無箠制狗狂一客叱狗吠一客言狗良良  
狗豈妄吠好言已莫詳言乃仁之趨叱乃義所當趨仁

不顧義非是助狗彘吾今不疑仁仁義嗟何妨

盜儒

其衣乃儒服其說乃墨夷天生物一本今爾二本為爾  
恐不葬親委以飽狐狸吾心則孟子不聽爾矢辭

宣城宰郭仲文遺林禽

右軍好佳果墨帖求林禽君今忽持贈知有逸少心密  
枝傳應遠朱頰映已深不愁炎暑劇幸同玉漿斟

自和

陶公種五柳華氏戲五禽達性與養生共得古人心佳  
果能御暑致之意何深河朔存故事助飲莫憚斟

送王克憲奉職之彭澤

折柳贈子行况聞彭澤去將過五株下可與青青助渭  
城人唱罷羌管愁吹處江上定多閒踈陰就箕踞

寄潘歙州伯恭

我貧性愛酒有酒無錢沽新安走牙兵六月至我廬手  
中持尺題肩上擔瓦壺高山度青天救此愁腸枯開之

聊傾樽渴肺如澆酥醉來欲學李白騎鯨魚又思阮籍  
跨蹇驢上溪無健鱗下嶺無壯駒憶君南望空長吁

再寄歙州潘伯恭

青山截天去古路蔽雲中不有行人至安知與郡通高  
樓雖窈窕遠樹已冥濛今日勞君問衡門一老翁

依韻和永叔澄心堂紙答劉原甫

退之昔負天下才掃掩衆說猶除埃張籍盧仝闕新怪  
最稱東野為奇瑰當時辭人固不少漫費紙札磨松煤

歐陽今與韓相似海水浩浩山鬼鬼石君蘇君比盧籍  
以我擬郊嗟困摧公之此心實扶助更後有力誰論哉  
禁林晚入接俊彥一出古紙還相哀曼卿子美人不識  
昔嘗唫唱同樽壘因之作詩答原甫文字駛穩如刀裁  
怪其有紙不寄我如此出語亦善詆往年公贈兩大軸  
于今愛惜不輒開是時有詩述本末值公再入居蘭臺  
崇文庫書作總目未暇綴韻酬草萊前者京師競分買  
罄竭舊府歸鄒枚自慙把筆粗成字安可遠與鍾王陪



文高墨妙公第一宜用此紙傳將來

依韻酬永叔示予銀杏

去年我何有鴨脚贈遠人人將此鵝毛貴多不貴珍雖  
少未為貴亦以知我貧至交不變舊佳果幸及新窮坑  
我易滿分餉猶奉親計料失廣大瑣屑且沉淪何用報  
珠玉千里來慇懃

依韻酬永叔再示

前歲守廩京城西有如勾踐巢會稽引盃嘗膽未雪耻

怒蛙起揖當湔蹄海天白日蔽光影霹靂一過收雲霓  
九臯澄明鶴翅濕欲暮刷羽聲嘶嘶客來東方美鬚鬣  
夜光出袖行無迷授予照眼已希世自顧臭穢猶萍蘂  
文章製作比善塑物象變怪一以泥泥雖各用有巧拙  
巧之高絕非由梯又聞東夷蹈水底騎頸直踞通天犀  
曼卿子美樓入室似使二嫂治朕樓舜歸在牀不可得  
此實素分非能齊而今我獨向田里秋稼已熟烹黃雞  
自傾白酒坐溪上誰念往日無梁梯隣邦或有寄嘉釀

瓦罌土缶盛玻璃昨喜得書書滿紙官尊職大憐我睽  
怪我書亂苦簡畧疲駕豈敢攀駿驪貴賤交情古來有  
胸中不欲置畛畦世間百事厭著意但願無病年壽躋  
田園未多亦粗給兒女況足資提攜終當去問綿上叟  
自與野老月下犁

池州蕭相樓

復所建

樓中九華峰天削水蒼玉公主何參差來雲自聯續我  
思唐蕭家八人居宰錄

瑞萬華復  
俛傲真邁

朱欄幾廢興下視寒

江曲吳侯來為邦百事無窘束新之以登臨風月詠玩  
足安得黃鵠翼一舉遺世俗

雜興

苦棟樹青鵲鵲啄鹽土鳴鳴鳴老鴉銜茶子爭噪落嶺  
隅不覺茶滿山漁利入江湖鹽由鵲鵲起茶由老鴉趁  
誘以觸禁網二鳥誰與誅

東家月吐明西家犬爭吠玉兔在中天曾何競窺穢姮  
娥雖夜行莫比淫奔廢嗷嗷籬下音胡不銓其喙

夢後寄歐陽永叔

不趁常參久安眠向舊溪五更千里夢殘月一城雞適  
往言猶是浮生理可齊山王今已貴肯聽竹禽啼

送王著作赴西京壽安

翔向

去作西畿令當趨大尹庭閒尋前代跡淨掃古槐廳未  
慣餐周粟還應憶楚萍但逢花木處知我昔常經

答了素上人用其韻

予心每淡泊世路多變詐梟鳴與鵬怪何用思彈射空

山雖夜行猛虎終不怕功名未逢時壯士且出跨七尺  
無競軀市人應亦訝有香知害身扶臍見窮廩一朝珠  
出淵百金未酬價爾尋遠公去挈鉢廬峯下我趨仁義  
急不解如陶謝

送通判黃國博入浙

西風半空鳴且嚎吳天點破吳鴻高東溪車馬走送客  
白露衰蘭輕若毛客當西歸乃東去為何欲及八月十  
五夜觀洪濤洗蕩生前邑邑不平氣付與滄海之水隨

滔滔却來廣陵願相見拍手大笑傾新醪一飲一石無  
一錢莫管寒近脫弊袍脫袍准酒不惜醉天意未必凍  
我曹

烏啄棗

樹頭陽烏饑啄棗破紅遶地青蠅老青蠅雨濕驚不飛  
殘棗入泥人不掃西風落盡烏亦歸晉客齒黃終懊惱  
真上人因送毛令傷足復傷冷二首

陶令歸時遠公送石苔秋雨步遲遲凌霄花在古松上

也笑向人人不知

聞道山中出入稀  
偶來溪上笑談微  
野雲不管田袍薄  
寒逼瘦膚相伴歸

潘歙州怪予遂行與黃君同路黃先游浙矣依韻  
酬寄

未識潘岳貌已知潘岳名  
去年改藩屏暫此解佩纓  
一見意已合談笑僕屢更  
豈唯文學富況亦論事精  
溪邊昔欲罷肩肩秋雨零  
于今又聞蟬重起悲涼情  
作詩遠



見招值我將西行譬彼矯翼鳥草然顧侶鳴蒼山不可  
陟空入江上舫黃君雖云約同泛明日自訪柳惲汀寒  
儒所向多不成或西或東車馬驚高樓登望酸目睛欲  
觀美濤仍膾鯨新安太守空相迎舉手謝君江水平  
潘歙州寄紙三百番石硯一枚

永叔新詩笑原父不將澄心紙寄予澄心紙出新安郡  
臘月敲冰滑有餘潘侯不獨能致紙羅紋細硯鑄龍尾  
墨花磨碧涵鼠鬚玉方舞盤蛇與虺其紙如彼硯如此

窮儒有之應瞰鬼

八月七日始見白髭一莖

昔見白髭驚今見白髭喜人將拔去之我獨不然耳拔之既更生留之何所耻白髭儻日拔日拔詎能已黑壯不為貴白衰不為鄙道德保於中任從髭髮齒

送僧了素游廬山

平生愛廬山夢寢不可去江上饒賈船偶來看已飫釋子言南游徘徊瞻瀑布月飛金熨斗光展千尺素嫦娥

呼織女機杼勿復措必虞山鬼笑皎潔無纖汙爾若見  
遠公贈之為坐具

宛陵集卷三十五

欽定四庫全書蒼要卷一萬四千四百七十六

集部

宛陵集卷三十六

宋 梅堯臣 撰

送方進士遊廬山

長風沙浪屋許大羅剎石齒水下排歷此二險過湓浦  
始見瀑布懸蒼崖繫舟上岸入松徑三日踏穿新蠟鞋  
路盤深谷出嶺望後山日照前山霾偶逢風雨恐衣濕  
側倚石脇人相垂雨收不覺在高處却見童僕提攜偕

水聲不絕鳥聲好藥草香氣侵人懷老僧避俗去足跣  
野客就澗開門闔樹巖隱映見寺剝層層杳杳躋雲階  
塢田將穫烏雀橫秋果正熟猴猿齧東林淡蘂應似舊  
唯此足以待爾儕子心灑落撇然徃我方塵垢難磨揩  
讀日者傳答俞生

宋忠為大夫賈誼為博士同與休沐下訪卜長安市吾  
不如二人讀書無舉跬借曰當秉肥秉肥非我指唯思  
泉石間坐卧松風美

隱靜山懷賢師自持栢栽二十本種於會慶堂

新作齋堂祠畫像又興高閣秋天蹤今朝還藉君移栢

昨日已因鵝種松

近以羣鵝換  
松植於路傍

九月六日登舟再和潘歙州紙硯

文房四寶出二郡邇來賞愛君與予予傳澄心古紙樣  
君使製之精意餘自茲重詠南堂紙將令世人知首尾  
又得水底碧玉腴溪匠畏持如抱虺拜貺雙珍不可辭  
年衰只怕擲撇鬼

九月十一日下昭亭舟中

平生山野性坐卧愛流水適從昭亭來興自明河起小  
舟浮輕槎身入星辰裏飲牛誰家郎照鬢誰家子隔岸  
心相望翻然洲鵲喜灘頭磷磷石欲贈畏指毀留取自  
支機成都無卜士

和張簿寧國山門六題

山門

按碑本軌轍作二軌雙峙作雙壁第六句作田外峰密回抱兮陳卑尊當從碑本

青山中穴為大門下通軌轍高莫論飛雲出納不計限

雙峙平削無刀痕入門復見田園美田外峰巒迴抱尊  
棲靈畜怪不可詰夔魑往往來守闔

紫雲巖

高巖日照雲常起吹作蘭花透紋綺橫為步障看未收  
山雨一來風滿耳

夕陽巖

日脚射空金縷直下映壁間拔未織野老先知雨又風  
明朝望此重雲黑



朝陽洞

洞門雖向扶桑開洞深不放陽鳥入古來道士今莫逢  
石壁乳流苔正濕

漣漪洞

流泉決決出洞底自有細浪非風吹山花逐水到山下  
漏泄人間春未知

碧雲洞

誰將萬古倚雲劒刺破蒼石天窓開下貯泓淵不可極

有時月漏清光來

將離宣城寄吳正仲

吳均詩語多奇揭苦情鴛鴦謝明月昭亭川上此禽聞  
為寄吳郎我西發西歸千里浮輕舟夜觀蟾光逆水流  
水流東海月西海各去雖殊意常在月偏皎皎隨人行  
水亦汙汙非浪改酒盆龍杓閒到吟梅花重葉將誰采  
湯珙秋校遺沉水管筆一枝

沉香細榦天通中束毫為呼諸葛翁久從海上厭持握

乞與阮籍書途窮物珍豈宜賤子有更後應合歸王公  
虛堂淨几塵不到硯旁置架珊瑚紅乃知用遇自有處  
君今莫歎居蒿蓬

艤舟昭亭送都官暫歸錢唐

前枉大梁城詩賦嘉入幙茲對昭亭山將行還有作別  
離此與彼終始情不薄我為解羈馬君乃高飛鶴塵蹄  
未能息健翅懷棲泊尋巢望吳田一傍華亭郭況多丹  
頂雛坐看翔寥廓

依韻公擇察推

君來何所聞君去何所見自古慕虛名往往輕既面竊  
常持賦稟平直如勁箭是以五十年長甘守貧賤相逢  
嗟未幾遽遠劇飛電今雖行已晚多謝勤相唁

晏成績太祝遺雙井茶五品茶具四枚近詩六十  
篇因以為謝

始於歐陽永叔席乃識雙井絕品茶次逢江東許子春  
又出鷹爪與露牙鷹爪斷之中有光碾成雪色浮乳花

晏公風流丞相族以此五色論等差遠走犀兵至蓬巷  
青筠出篋封題加紋拓水簔作精具靈味一啜驅昏邪  
神還氣王讀高詠六十五篇金出沙已從鍛鍊出至寶  
終老不變傳幽遐自唯平昔所得者何異瓦礫空盈車  
滌心洗腑強為答愈苦愈拙徒興嗟

留題開元寺僊上人平雲閣

背市面山色平目觀白雲漁舟溪上歌游客攔邊聞俯  
簷翠栢瘦蔓籬秋實蒼偶來心意靜塵慮如掃空

送黃生

我本東西南北人窮途不復淚霑巾亦知車馬有行色  
為見長沮與問津

別張景嵩

我雖識君晚君能知我心我心昭亭水見底無尺尋照之  
不為隱測之不為深魚鰕既混混藻荇亦侵侵終當至滄  
海浴日開黃金君當下灘去石浪激寒音猶能洗君目  
病醫雲銷岑

別鍾京

我憐鍾氏子冒雨為求文暫以經茲邁與之書所聞野  
鷗窺筆硯舟子采蒿芹況有新炊飯簞漿可送君

江口遇劉紉曹赴鄂州寄張大卿

我同陶淵明遠憶顏光祿得錢留酒家醉卧江蕪綠故  
人已貴身獨賤籬根枯死佳花菊孤鴻飛去鸚鵡洲寄  
聲高樓謝黃鵠使君本是洛陽人嘗憐酩酊銅駝曲休  
將玉笛城上吹武昌老人聽不足已知清音通九霄定

應悔說蘄州竹

送劉紉曹

溪邊前日君辭我江上今朝我送君  
自去蘆洲寄消息故人猶在武昌軍

寄題開元寺明上人院假山

石是青蒼石山非杳藹山諸峯生鏡裏  
小嶺傍池間雨不因雲出門疑為客  
關何須費蠟屐暫到此中間

寄李獻甫



何言自我去眼前一似空城中豈無人過目猶飛蟲又  
厭塵事多枳棘生胸中安知秋江水淨碧如磨銅尚恨  
有世累不及垂釣翁望望當速來止琴視孤鴻

行路難

途路無不通行貧足如縛輕裘誰家子百金負六博蜀  
道不為難太行不為惡平地之一錢寸步隣溝壑

題姑蘇豹隱堂

青山崔嵬藏古基文豹不見空斷碑華堂重構猶隱霧

地今易主還好竒欲邀明月一去飲嫦娥將悔出海遲  
谿邊少年意氣在來往只借白鹿騎自稱山人具有酒  
酒酣請我留此辭謫僊墳近何可問當日無詠亦所疑  
雨還

雨濛濛兮欲暮路險絕兮深泥嗟予僕兮甚餒畏予馬  
兮顛蹄關已度兮心緩家將至兮涉溪喜膝前兮童稚  
餉燈下兮女妻

哭笑鳥

日月轉入地星辰蔽重雲夜色晦若漆怪禽巢未焚其  
音哭且笑哀樂詎能分方哭且笑時曾莫有以羣哭為  
何所悲笑為何所聞了不預人事吉凶誰復云

山行冒雨至村家

雨急芹泥滑禽鳴苦竹秋野香生草木雲潤上衣裘入  
石纔通馬穿林忽隱牛山家多淺井下照碧峯頭

八月九日晨興如廁有鴉啄蛆

飛鳥先日出誰知彼雌雄豈無腐鼠食來啄穢廁蟲飽

腹上高樹跋膚噪西風吉凶非予聞臭惡在爾躬物靈  
必自絜可以推始終

夜坐

夜久方慮寂空堂燈燭明落葉有暫響暗蟲無停聲力  
學不為己甘貧且徇名聊為詠懷篇還想阮步兵

八月十五夜有懷

天為水蒼玉月挖潭面冰萬里絕瑕玷百丈已澄凝山  
河了然在星斗光莫增借問九州內豈無陰雲興緬懷

去年秋是夜客廣陵太守歐陽公預邀三四朋乃值連  
連雨共飲陳華燈既醉公有詠屬和予未能強賦石屏  
物固慙無所稱今來宛溪上聊以故歲徵晶明正若此  
霖霖且何曾美景信難并康樂語足憑

題吏隱堂

新堂生虛明未悟追隱吏無乃隱非時唯應喧可避移  
花莫傷根種竹不改翠牀中置素琴亦見陶潛意

詠嚴子陵

不顧萬乘主不屈千戶侯手澄百金魚身被一羊裘借  
問此何耳心遠忘九州青山束寒灘濺浪驚素鷗以之  
為朋親安慕乘華輜老氏輕璧馬莊生惡犧牛終為蘊  
石玉復古輝巖陬

與潯陽舍弟別

昭亭潭上水下與九江通去客解輕舸落潮乘順風迴  
頭迷遠樹沒背見飛鴻寂寞還蓬巷桓彝宅近東

九月十八日山中見杜鵑花復開

山中泉壑暖幽木寒更華春鳥各噤口游子未還家云  
誰未及還對此重興嗟何必因啼血顏色勝曙霞

記歲

買臣四十八猶苦行負薪我免以樵給貧居年與均道  
上不謳歌妻亦無恙嗔三者固異彼異同雙朱輪

種胡麻

悲哀易衰老髮忽見二毛苟生亦何樂慈母年且高勉  
力向藥物曲畦聊自薈胡麻養氣血種以督兒曹傍枝

延扶疎脩莢繁索韜霜前未堅好霜後可炮熬誠非騰  
雲術顧此實以勞

達觀禪師曇穎住隱靜蘭若或言自此獼猴散走  
不來穎嘗哂曰吾知是山枇杷為多始至也未實  
故其去將實也必羣集後果然穎惡乎俗之好異  
恐傳以為人惑欲予詠而播之

隱靜山中寺獼猴往往過導師歸以去盧橘熟還多禪  
地寧求怖居人切莫訛未嘗嫌此物任挂古松柯



穎公遺碧霄峰茗

到山春已晚何更有新茶峰頂應多雨天寒始發芽採  
時林狹靜蒸處石泉嘉持作衣囊祕分來五柳家

送達觀禪師歸隱靜寺古律二首

初逢洛陽陌再見南徐州所歷幾何時倏去二十秋今  
復振霜屨還山遠莫留我詠阮公詩物靡必沉浮誰云  
西海魚夜飛東海頭世人嗟識昧豈是滯林丘

栗林霜下熟歸摘禦窮冬帶月涉溪水過山聞寺鐘未

嫌雲衲濕已喜野人逢且莫似盃渡滄波無去蹤

冬至感懷

銜泣想慈顏感物哀不平自古九泉死靡隨新陽生稟  
命異草木彼將漸勾萌人實嗣其世一衰復一榮

冬至日得師厚宋次道中道書

水國欲為雪野冰將合河人同一陽至淚向八行多明  
意今猶在年華悵似過看看四十九應笑此蹉跎

擬水西寺東峰亭九詠

垂澗藤

澗深連石壁石上生長藤孤猿來自熟緣飲下復登賴  
無樵人跡且免束薪蒸

嶺上雲

我來東峰下遠見西嶺頭白雲忽已合向此偶遲留人  
誰問何有自可忘殷憂

林中翠

萬木總柔翠況復新晴時日色照欲動山氣斂還遲望

之如何攬舉袂隨風吹

棲烟鳥

斑斑遠林鳥極目波烟中各識時早暮不忘巢西東推  
物得真意吾將效陶公

古壁苔

陰壁流暗泉古苔長自好不改春與秋何如路傍草空  
山正幽藹淨綠無人掃

幽徑石

緣溪去欲遠磊砢忽礙行旁臨側身險下忽寒流聲幽  
客慣來往同此猿鳥情

寒溪草

青青色堪染欲辨不知名根陰託乳魚水底抽新萌  
康樂池上詠獨與春夢成

陰崖竹

背嶺斷崖下老竹生扶踈孤根石上引勁節松不如  
莫言霜雪多終見綠有餘

臨軒桂

山楹無惡木但有綠桂叢幽芳尚未歇飛鳥銜殘紅不見離騷人憔悴吟秋風

依韻和達觀禪師還山後見寄

雲歸在高嶺人見是無心矯矯將棲鳥遙遙傍故林南方雖有暖臘月易成陰唯恐多風雪幽期未可尋

九華隱士居陳生寄松管筆

春松抽瘦梗削束費長毫雞距初含潤龍鱗不自韜嘗

為大夫後欲寫伯夷高一獲山家贈令吾媿汝曹

古柳

岬側古大柳誰種臨長江中自出蠹蝨百歲成枯腔忽  
值漲流沒槎牙綴旌幢腹膚藏蛟龍半夜雷砰訇飛霆  
痕尚白如斬馬陵龐倏爾巨電至萬弩聲裂缸又為狂  
風摧所殘唯朽椿卧榦越大鼎絕臄不可扛就蕪以照  
漁駭鱗一何厖始知網罟細未足禁突撞隆準以脫去  
城下徒焚降我從洲上泊昏曉晚船牕始終覩變毀欲

賦桃殘釭吾交評韓詩險韻古莫雙安得共詠此但嗟  
各他邦

放鵲

并序

烏鵲啄豆於槽固夫患之以機得鵲其羣噪如救為下  
上突掠甚急知不可脫聲益哀予閱之命釋縛放去因  
為之辭

鵲為禽之靈智兮胡蹈機而不知為庸阜以困束兮固  
性命之將危喜遠人之至止兮始屢驗以如期向何預



覺兮此何自昏豈專心以謀食兮昧目前之禍根苟所  
履必慮患兮莫若去人遠以圖存屑餘秣以致死兮誠  
咎爾而無耻維羣鳴之苦傷兮使吾心之惻爾予測孔  
孟兮爾自解則艱阜聽予言兮釋爾而還撫爾咒爾兮  
爾無甚頑後誰恤爾兮拓彈方彎

聞西山虎

猛虎畏白日孤客莫夜行彼以不暴衆此何獨忘生饑  
必見人食不食且無名麋鹿能遠遁安得逢怒獐由人

不由常役役官有程

凍禽

高樹繞吾廬薄暮烟氣重將棲立傍巢已振窺落翫有  
來同拚枝亦各不俚擁颼颼陰風寒夜雪豈無恐

登乾明院碧鮮亭

餘喘不苟盡順俗來飯僧東嶺有上方脩竹蔽觚稜下  
有蒼石案旁挂孤蔓藤繫累向塵世更住殊未能

隱靜遺枇杷

五月枇杷實青青味尚酸獼猴定撩亂欲待熟應難

正月十日五更夢中

今年花似去年新去年人比今年老我勸厚地一盃酒  
收拾白日莫苦早

紅梅

家住寒溪曲梅先雜煖春學粧如小女聚笑發丹唇野  
杏堪同舍山櫻莫與隣休吹江上笛留伴庾園人

寄文鑒大士

讀書夜寂冷無火捲卷遂成搖膝吟始憶高僧將偈去  
安知古寺託雲深寒堂正睡遠鐘發野鳥亂鳴殘月沉  
明日呼兒整簋輦欲煩重過小溪陰

### 海棠

江燕入朱閣海棠繁錦條醉生燕玉頰瘦聚楚宮腰曾  
不分香去尤宜着意描誰能共吹笛樹下想前朝

嘗於  
宋宣

獻宅見圖畫明皇於海棠花下  
卧吹觱篥寧王吹笛黃幡綽拍

### 送餘干李少府

作尉古來清況於子越城舟中雨新足溪上水初生蒼  
鰲出還沒素鷗飛且鳴休將五色棒欲取洛陽名

宛陵集卷三十六

欽定四庫全書薈要卷一萬四千四百七十七

集部

宛陵集卷三十七

宋 梅堯臣 撰

與二弟過溪至廣教蘭若

溪水今尚淺涉馬不及羈岸口出近郭野徑通平田行  
行渡小橋決決響細泉萬木陰古殿一燈明象筵長廊  
顏顏碑字體家法傳空堂裴相真白髯垂過咽名跡兩  
不滅豈獨畫與鐫高僧鑿崖腹建閣將雲連祕此龍鸞

迹足使臣僕虔脩竹間長松森衛若被堅是必神物護  
禹穴空歲年飯訖過山後井傍攜茗煎探幽偶轉谷忽  
視昭亭巔蔓草不識名步側時得牽幽禽聲各異可辨  
惟杜鵑似驚俗客來聒聒兩耳邊弊廬隔城堞畏暮遽  
言還道逢張羅歸鳥媒兼死懸遂同山梁雉令我復喟  
然聊追一日事書以為短篇

晚坐北軒望昭亭山

少客兩京間熟遊嵩與華歸來宛溪上賦往昭亭下何

以厭昭亭衰遲倦驅駕况復慙詠歌嘉辭前有謝咀嚼  
在人口甘美如食蔗方同陶淵明苦語近田舍節行固  
不變出處亦多怕常防惡少年豪橫使出跨譬如故將  
軍尚被亭長罵不若守弊廬讀書至中夜

與諸弟及李少府訪廣教文鑒師

山僧邀我輩置酒比陶潛紫蕨老堪食青梅酸不嫌野  
蜂時入座巖鳥或窺簷薄暮未能去前溪月似鉤

至廣教因尋古石盆寺



古寺近田家山尋石盞差化蟲懸縊女啼鵲響縹車僧

坐樹間石馬行溪畔沙野香無處辨歸路傍城斜

郡人不知

古石盞寺在此山之傍舊基存焉山中有井相去可二里豈圖經所傳裴休井歟近城有石盞寺其側亦云裴相井者恐非是何則杜牧有石盞山詩是寺因山名也從近城莫究其由呼盞為盞必風俗訛也

觀王介夫蒙亭記因記題蒙亭

吾年將五十尚未暇讀易一聞蒙亭說乃見適所適維時明進退豈不在泉石野服製升越山庖盛雞蹠牀頭龍唇琴案上科斗籍風物稍佳時把酒會三盞況以兄

為郎仕也人豈迫重之愛之深自匪逢時客

亢陽和欲行舟者

春秋書閔雨乃見先王制有意在黎民山川無不祭今  
者望雲霓青天絕纖翳為壇割舒鴈盤血陳水汭于時  
頗精虔奠爵必親況向夕有微陰掃然還復霽吾聞先  
儒言陽驕不能閉此時繫穹旻已力安所詣宣王雲漢  
詩曾不鑒上帝恨無鼻盪舟空自思躍蟻

黃鶯二首

內家初上翠微宮  
樹裏窺人在半空  
笑語漸高無約束  
侍臣偷望向雲中

西鄰少年今出遊  
東家女兒未識羞  
門前烏白葉已暗  
日暮問誰牆上頭

送懷賢上人歸隱靜兼寄達觀禪師

適從山中來復向山中去  
為報山中人莫厭山中住  
近城塵土多亂爾烟霞趣  
野蜂銜漆汁尚欲為蒂固  
息此可以安其能忘我論

送瑞竹長老歸當塗因寄徐著作

謝傳青山路春來蔓草生樵蘇猶不入瓶錫莫能行朝

上野船去宿逢溪雨鳴多應見康樂曾重遠公名

和師承嗣

達觀徐君  
頗稱之

鶯

桑間小婦好聲音映葉穿枝意已深盡日呼郎郎不應  
蕭蕭風雨到前林

守宮

嘗聞漢武帝偶問東方朔臣擬作龍呼慙無頭上角

夏園

夏園甘果熟日覺樹林稀休笑道傍李無人摘自肥

孔子廟震

宣城

霹靂下虛殿破楹非夢凶昔嘗瞻畫衮今實見升龍隱  
隱雷聲散疎疎霧氣從予知仲尼廟不是蓄乖慵

寄酬睦州晏殿丞

渚潭吐明月杳杳及吾廬流彩滿懷袖託情非鳥魚朝

因南澗雨暮入北畦鋤豈不藉餘潤况茲方飢蔬

李仲求寄建溪洪井茶七品云愈少愈佳未知嘗  
何如耳因條而答之

忽有西山使始遺七品茶末品無水暈六品無沈祖五  
品散雲脚四品浮粟花三品若瓊乳二品罕所加絕品  
不可議甘香焉等差一日嘗一甌六腑無昏邪夜枕不  
得寐月樹聞啼鴉憂來惟覺衰可驗惟齒牙動搖有三  
四妨咀連左車髮亦足驚疎疎點霜華乃思平生遊

但恨江路賒安得一見之煮泉相與誇

送闕令之潭州寧鄉

秋風逆水急挂席飛鳥輕三江去雖遠一日行幾程朝  
辭洞庭岸暮抵巴陵城長沙古建國地狹賦薄征邑宰  
愛民者選薦豈非精既曰處民上固當知民情民居篁  
竹間山獠相雜并教道苟未至毫髮心起爭太剛易斷  
折太柔難撐撐貴在得中道於焉無近名聞多不祥鳥  
似鴉何足驚遠方此為常慎勿心屏營賈誼度湘水為

文弔屈平因君寄盃酒為我酌賈生

乾明院碧鮮亭

壞衣削髮遠塵垢  
蛇祖龍孫生屋後  
不等渭川千戶侯  
尺椽片瓦何嘗有  
方丈東頭一畝餘  
中軒四面無牕牖  
青瓊作枝鈿為葉  
丹鳳未食蒼鼠走  
細藤織榻白晝眠  
寢濃鼻息如雷吼  
世間百事不厯心  
門外寒流徹溪口  
得餘干李尉書錄  
示唐人于越亭詩  
因以寄題

餘水之干越之鄙  
築基相對琵琶尾  
琵琶日日有秋聲



鴈過洞庭風入葦南斗戛湖波不起長刀剡峯碧耳耳  
姍娥夜出在寒溪青銅瑩磨光幾里朝因吳客幅蒲輕  
滿紙如蠶書可喜

南軒盆植重臺蓮移種池

彤雲赤霧生緒房朝霞變藥朱粉光白玉入泥不滿盎  
羽蓋裛露明月璫濁水一石亂鼃黽鑿池五丈如斗方  
萍根科斗得自在荷芰明年出水央

朝天行

大車高蓋徐方來天子雙日延英開犀靴踏玉陛東陞  
從臣賜對論宮市諫官御史如指排捧土未能障濁水  
大夫言幹天關迴黃門白望顏色死始時暴奪何縱橫  
有貨晝日不敢行他時五方虵當酒誰道張郎臨井口

會勝院沃洲亭

前溪夾洲後溪闊風吹細浪龍鱗活孤亭一入野氣深  
松上藤蘿籬上葛葛花葛蔓無斷時女蘿莫翦連古枝  
當年吾叔讀書處夜夜濕螢來復去

江南雜感

樹頭巧婦棲樹下秋蟲織壞衣遊子心千里嘗相憶蕩  
子脚出門便作浮萍根憂來憑五兆拜樹賽黃豚

依韻和達觀師山中見寄

豬豕在塗龍在澤豺狼食肉麝食柏蹄毛與角不對齒  
啄觜兩足副以翮既能閒閒住深谷豈使于于佩鳴玉  
水邊看虹山雨霽夜與明月歸獨宿門前重嶺後羣峯  
石樓朱殿藏林中銅絲緊轉轆轤響絡緯秋老嘯西風

榮利淡薄無易此彼飲甘醲茲飲水暫將分別向喉舌  
何異聲色亂眼耳孔孟久歿言可師千古布散葉與枝  
今來閉戶自有趣世上沄沄非我為

送萬諤昌秀才

志士不戀家安能坐吟咀儒冠難徒行馬骨瘦可數後  
僕隔山陂前林遇風雨寒村夜宿時寂默誰對語

訪石子澗外兄林亭

前日秋水漲昨日秋水落偶來尋隱居曾不乖宿諾竹

底除舊徑藤蔓繫新約馬留岸傍樹風掃林下穉既能  
置魯酒又復餉楚飴誰知北南澗照影似清洛平生愛  
幽曠斂迹誠非錯

和端式上人十詠

幽谷泉

幽谷有飛泉入溪知幾里跳珠濺木葉激雨霏巖趾但  
無箕穎人曾不吝洗耳

古木陰

古木少直枝其下多曲影豈不愛高陰柰此性所秉千  
重葉蒼翳誰願憩日永

寒溪石

翠聳寒溪上半隱寒松下水鳥立稜角淵魚游穴罅尋  
常置庭檻瑣細不知價

孤汀蘋

瀟湘歸去人正值江南春始願逢拾羽今乃見採蘋寄  
語柳使君莫恨日已曛

雲際鐘

烟昏青櫟道風急隔溪鐘  
征馬未及息猛虎前有蹤  
尋聲欲投宿僮僕畏所逢

垂崖鞭

崖竹出石壁根瘦懸青虵  
磔髯露老節斫骨點寒花  
少年莫翦去騎殺白鼻騮

天外峯

天外一尺峯國中千仞嶽  
重雲不掩蔽萬里見頭角  
世

人看遠碧誰識產美璞

秋原菊

不為潭上英不助籬邊醉獨占蘭杞隣原頭自榮悴陶  
令與太鑿逢人豈無意

漁舟火

蘆洲一點明知有漁人泊江溟杳不分誰方在高閣是  
時孤鴈去應認光中落

春溪水



春水冰欲開傍岸已微釋魚寒未動鱗獸渡時有跡篙  
師畏割舟敲拉碎圭壁

十月二十一日得許昌晏相公書

哀憂向二年朋戚誰與書敢意大丞相尺題傳義廬從  
來鳳凰鳴不厭寒竹疎茂林多翔鳥要路盛高車窮巷  
一如此江深無鯉魚

訪施八評事

施兄今七十近郭隱茅廬懶問齊民術喜看莊叟書竹

間鳴澗水原際見村墟識盡窮通理超然樂有餘

贈陳無逸秀才

良犬不取鼠其人苦尤之近識固未辨善相又能知在  
鹿忘守穴捭足乃焉而士有志功名局縮秉書詩憔悴  
未得展磨折忽言卑舉酒一以贈願無羞爾為

題陳宰戲綵亭

仕宦固已美及親此其難况慕五綵戲而奉興居安翁  
喜君亦喜翁餐君亦餐噉噉園中禽口哺心違九邑大

歲幸稔衆賴仁政寬還思彼赤子如恐君不歡

永慶僧舍松風亭

誰按黃金徽滿指清風度但聽松上聲不知松間趣野  
僧何所樂樂此數株樹寧邀俗客來草綠澗西路

寄松林長老

大松五丈百歲餘小松五尺前時種俱有堅完不朽心  
莫以今輕古為重東溪一片寒玉光夜挂高枝何所用

題松林院

靜邃無塵地青熒續焰燈木魚傳飯鼓山衲見歸僧野  
色寒多霧溪痕夜閣冰吾非謝康樂獨往亦何能

永州守王公愷寄九巖亭記云此地疑是柳子厚  
所說萬石亭也因為二百言以答願當留詠

天地磨今古賢愚為埃塵草樹易變改山川無故新眷  
言零陵守白髮駕朱輪間來問遺老俯跡哀昔人昔人  
者誰歟元和前放臣下上窮幽荒憔悴楚水濱試觀當  
此記圖寫未必真最苦來黃溪坐石數游鱗有鳥大如

鵠東向立不跂始買鈷鉬潭鄠杜難計緡冉溪袁家洞  
亂石多磷磷深里與沸白若盡無窮津石渠連巖泓菖  
蒲被其根窮勝得其詭衆美誰齊均西澗石為底豈無  
片與蘋澗崖如堂席澗響如龍唇折竹掃陳葉羅榻同  
衆賓其言粲星斗百歲猶比晨萬石乃淺近尚可資覆  
巾而况前所說但恐煩鐫珉

潘樂二君對雪寄聲似欲予賦適方知之走筆奉  
呈

南方今見雪北客定思家任凍不欺酒競春先著花樓  
高休厭上山近未應遮誰問窮居日西牕壓竹斜

過永慶院

荒涼舊蘭若古屋兩三重庭下已無柏澗邊惟有松石  
堦生薜荔香座缺芙蓉化俗似禪衲破來縫不縫

雪中廖宣城寄酒

輕舟泛泛昭亭灣春雪漫漫昭亭山寒沙曲渚者不辨  
素鷗翔鷺空中還宣城太守閔窮旅雙壺貯醞兵吏頒

任從六花壅船戶滿酌春色生衰顏醒時但愛雲水好  
醉後等與天地間世間取樂各有分何必舞娥高髻鬟  
翠竹亭

種竹幾千个結亭三四椽遊人多寂靜啼鳥亦留連酒  
有陶公愛林希阮氏賢我來歸路遠躍馬古城邊

彩霓亭

高出嶺頭樹俯窺城下溪半山飛急雨舉手弄晴霓曠  
望已無極萬緣都與齊自嗟來獨晚征棹苦言西

留別樂和之

雪消潭水綠輕舸下灘時  
漸轉青山去還將故國辭  
野林看欲動江燕欲逢遲  
君語隨州體余慙晚始知

松風亭

冉冉竹連澗森森松蔭崖  
始聞清吹度似欲綠琴諧  
莫識主人意休論高士懷  
春城百花發薜荔上陰階

雪中懷廣教真上人

蒼山去不遠日日起寒雲  
堂上看飛雪水邊思練裙  
銅



餅生薄凍桂火壓殘薰欲往有餘興林幽路不分

下赤山嶺過渡至石子澗別施八評事

三歲守廬次兩迴來澗邊臨塘愛魚樂近竹見人賢  
今我西歸日逢君小隱年重將車馬去驚起野鷗眠

春日拜壠經田家

田家春作日日近丹杏破顰場圃頭南嶺禽過北嶺叫  
高田水入低田流桑牙將綻霧露裛蠶子未浴箱篚收  
今我還朝固不遠紫宸已夢瞻珠旒

將行賽昭亭祠喜雨

未生潭上雲空望山中雨湛湛陳桂樽坎坎奏鼙鼓蕭  
蕭靈風來蹲蹲祝郎舞莫言春作遲但念寒灘阻何當  
發泉源綠水浸沙渚不與農者期自將舟人語定作榜  
歌行暮投丹湖浦瞻祠草樹失認嶺烟霞吐平吞東南  
吳遠帶西北楚川澤見坡陀龍蛇蹙鱗脊人經興寤歎  
事往成前古考碑何驗今塗馬立空廡余知骨相貧豈  
敢望冥許願乘溪流深滂沛隨徹俎

若訥上人彈琴

祥哀已踰月遇子彈鳴琴安得不成聲子心異吾心十  
日成笙歌尼父非好音先王禮有節不可過於今莫作  
風入松懷壠情未任一聞流水曲歸思在溪陰此焉吾  
所樂目極送歸禽

發昭亭

二月十三日

春泥深一尺車馬重重跡親舊各還城山川空向夕今  
朝水平岸不畏舟礙磧始隨湍漲發已入青蒼壁落日

未逢人孤村望來客泱泱漫田流青青被壠麥欲霽鳩  
亂鳴將耕杏先白我無農畝慙千里事行役寄謝昭亭  
神果不吝深澤

乘小舟訪松山法聰上人

我從溪口來正值前山雨濕衣逢梵宮有僧善吳語天  
寒蜜已空軒靜竹可數歸楫難久留汀鷗自飛舞

過鴈洲 六言

船從鴈洲北去鴈背春風亦歸但見平沙綠水蘆蒿荻

笋方肥


別達觀文鑒二大士

雲衲山中來畫橈江上發何日到山中山花應未歇

依韻和文鑒師贈別

來見寒沙鳥長隨上下波乃知游宦跡不似施松蘿子  
語馬喻馬吾吟柯伐柯清江挂帆去柰憶故山何

宛陵集卷三十七



總校官庶吉士臣張能照

校對官庶吉士臣戴心亨

謄錄監生臣徐繩玉

謄錄舉人臣孫潢